

JAORGANK 9 - 2015

# de Vuilewapper

OETGAVE VAN SJTADSVASTELAOVESVERENIGING D'N UUL REMUNJ



## Toss d'n Eerste

JEUGPRINS D'N UUL 2015

# LEEF UULEKIENJER!

EN NETUURLIK OUCH LEEF 'ALLE ANGER KIENJER OET REMUNJ EN ÔMGAEVING!' WANT DE UULEWAPPER IS D'R NEET ALLEIN VEUR DE KIENJER VAN SJTADSVASTE-LAOVESVERENIGING D'N UUL. MER VEUR ALLE KIENJER VAN REMUNJ DIEJ 'T SJOON VINJE ÔM IN 'T PLAT VAN ALLES TE LAEZE EUVER OZE JEUGPRINS EN EUVER NOG HEEL VÄÖL ANGER ÔNGERWERPE.

'VEER ZEEN VASTELAOVEND' IS 'T MÔTTO VAN D'N UUL DIT VASTELAOVESSEZOEN. DET BETEIKENT VEURAL DES SE VASTELAOVEND VIERE SAME DUIS. SAME MIT VRUNJ EN VRUNDINNE, MIT KIENJER EN MIT VOLWASSENE. DOE KINS WAAL ES EINZELGÄNGER OP SJTAP GAON, MER ES SE DEN ECH ALLEIN BÖS IS OUCH NIEKS. EN PAP OF MAM KINNE WAAL MIT HELPE MIT 'T REGELE VAN 'NE SJIEKE ARTIESTEMIDDAAG, MER ES D'R DAN GEIN LUUJ KÔMME KIEKE... DE MIENSE DIEJ REGELE EN DIEJ WAAT KÔMME KIEKE, EDEREIN, GROOT, KLEIN, ES GROEP OF ALLEIN, DIEJ ZEEN SAME VASTELAOVEND. DOOT GEER ALLEMAOL MIT? DEN KINNE VEER ZEGKE 'VEER ZEEN VASTELAOVEND!'

DAE GANSE VASTELAOVEND VINJ ICH 'N MAGISCH FEES. AL DIEJ KLEURE, DAE MEZIEK, DIEJ GEKKE MIENSE. EDER JAOR WAER ICH DAO DOOR BETOUVERD EN IN MIT GEZAAGE. 'T IS DEN OP ASGOONSDAAG NET ES OF ICH WAKKER WAER OET 'NE DROUM. IN DEZEN UULEWAPPER KINT GEER LAEZE EUVER VAN ALLES WAAT MAGISCH IS.

EN WAAT VINDJ GEER VAN OZE JEUGPRINS TOSS I MIT ZIEN DRIEJ ADJUDANTE SEM, JESSE EN EUNICE? DIEJ ZEEN SAME OUCH MAGISCH OF NEET DAN? ALWEER 'N MAEDJE IN 'T JEUGPRINSELIK GEZELSJAP! ZÖLLE VEER DAN EUVER 'N PAAR JAOR 'N JEUGPRINSES HÖBBE....? ICH ZEEN HÄÖR VEER D'R GAER TOSSE IN EN DET ZIEJ D'R ALLE VEER TOSSE IN SJTAON KINT GEER SJTRAKS ZEEN EN LAEZE. TOSS I, SEM, JESSE EN EUNICE, GEER ZEET VASTELAOVEND!

## JUULKE



### LÈT OP:

OP SOMMIGE BLADZEIJE SJTEIT 'N LOGO AAFGEBEELD VAN DE LAYAR APP. OP DIEJ PLAATSE KINS SE NOG 'N EKSTRA MAGISCHE VERRASSING VINJE! KIEK VEUR D'N OETLIGK HIEJ EUVER OP BLADZEIJ 35.





## UULESJLAGER 2015

Eder jaor, vlak veur det 't seizoen begint, is d'r de Leedjesavond van D'n Uul. Det is 'ne wedsjried wó bie j' t winnende leedje zich de Uulesjlager van det jaor moog neume. 't Is ein magisch gevoel óm dae titel Uulesjlager te winne.

Veur Mick Leijendeckers is 'ne magische droom oetgekómme. Net wie j' ziene pap det al dökker haet gedaon, geit Mick kómmend seizoen heel dök veur uch zinge: de Uulesjlager 2015! Oefen de teks mer good, den kint geer mit zinge!

### ICH LAEF VASTELAOVEND

Refrein:

Ich laef vastelaovend, nieks hilt mich nog toes  
Sjooi ich door de sjtraote, sjmink diek oppe sjoet  
Ich bön vastelaovend, 3 daag aan ein sjtök  
Gaef mich ins ongeliek, ich lach en veul mich riek  
Mit dees daag sjtraal ich van gelök.



De middaag en de aovend sjmelte same sjoon inein  
Es ederein de glaze höft en danse óngerein  
't Is euveral gezellig, nemes wilt nao hoes toe gaan  
Dan dink ich bie mien eige, moog dit nog lang besjaon!

Refrein

Ein zatehermenie bleus zaat, de aovend in de nach  
Eine clown dae kós ein ingelke en ein non sjuut inne lach  
Zo is d'r euveral get loos, veer lache ós get aaf  
Dan dink ich bie mien eige, dit nimt mich nemes aaf!

Refrein 2x



KIEK VEUR 'N  
EUVERZICH VAN ALLE  
UULESJLAGERS OP  
[WWW.DN-UUL.NL/](http://WWW.DN-UUL.NL/)  
HISTORIE/  
UULESJLAGERS



# VEER VEER D'R

**Dit is de liefspreuk van oze nuje Sjtadsjeugprins Toss I Vilters. Hae geit dit seizoen, same mit zien adjudante Sem Lommen, Jesse Vollebergh en Eunice Hamers, de Remunjse jeug en de ganze Sjtadvastelaoves vereniging D'n Uul veur es Jeugprins Toss d'n Eerste. Mit zien veer doon ze altied heel vööl same en daoróm wille ze ouch same vastelaovend viere.**

Toss is op 10 oktober 2002 gebaore aan 't Munsterplein. Midde in 't Uuleriek. Es zoon van Aad Sjtadsprins Danny I (2009) en Janine Wassenberg. Toss is 't breurke van Beau (17 jaar), Aad Jeugprins Goof I (2011; biejnao 16 jaar) en Loek (13 jaar). 't Prinselik gezin woont noe prinsheerlik oppe Roodakker aan 't voetbalveldj van SHH. Toss ziene pap Danny I is in 2009 Sjtadsprins van D'n Uul gewaes. In det zelfde jaar waas Goof Jeugprins van SHH Herte. Ómdet ziene pap en Goof al prins bij D'n Uul zeen gewaes had Toss neet meer verwach det ze hem zólle vraoge. En noe is 't dan zowied: Toss I is Sjtadsjeugprins van D'n Uul.

Toss zit in groep 8 van de Sjteine Brök bij meester Han. Mer Toss geit lever voetballe in de D4 van SHH of Fifa 15 sjpele op de playstation. Ouch tillevisie kieke en oppe laptop klómmele zeen hobbies van Toss. Zien favoriete aete zeen spare ribs en caramel bonbons van Rousseau. Neet tegeliek netuurlik. Toss haet (nog) gein hoesdiere, mer zól waal gaer 'n hundje wille höbbe.

Toss sjpits zich al op de vastelaovend, ómdet d'r es Jeugprins mesjiens waal nao de Vrouwluujzitting moog gaon kieke. Mit D'n Uul same op paad mit de bös vindj hae ouch heel vet. En Toss vindj 't leuk óm mit de vastelaovesdaag nao de Pöppe-dokter te gaon óm allerlei gerei te koupe (serpetines, heliumbelónne en flikkersjterre). En 't allersjiekste is netuurlik det hae det same met Sem, Jesse en Eunice kin doon. En diej gaon veer noe aan uch veursjtèlle.

**Adjudant Sem Lommen** is op 13 mei 2003 gebaore in Remunj en is noe dus 11 jaar. Zien eljers zeen Roland Lommen, baeter bekind es DJ Rolo, en Françoise Tijsses Klases. Françoise haet oojt mitgedaon aan de Kienjer-middaag van D'n Uul. Ouch Sem zit in groep 8 van de Sjteine Brök bij meester Han. En Sem is ouch voetballer; neet bij SHH mer in Leeve bij de D2.



# TOSSE IN!

Wiejer sjeelt Sem gaer boete en hae goochelt. Mesjiens kriege veer waal 'n paar truuks te zien. Zien favoriete hoedier is de hõndj Tuimel en 't lekkerste aete vindj d'r pizza. Mer mit de vaste-laovesdaag wilt hae gaer spare ribs aete bij Amon en vää! sljók vange in d'n optoch. Sem vindj 't sjiek óm adjudant te zien van ziene vrundj Toss.



**Adjudant Jesse Vollebergh** is op 1 september 2005 gebaore in 't ziekehoes van Remunj en is noe 9 jaor aad. Ouch Jesse zit op de Sjteine Brök in groep 6 bij juf Karin. Zien eljers heite Jeroen Vollebergh en Vivian de Bock. De pap van Jesse is adjudant gewaes van prins Paul II Hamers en ouch lid gewaes van de TC van D'n Uul. De mam van Jesse haet vreuger gedans bij de Kienjergarde en de Jeuggarde. Jesse haet ouch nog 'ne grote broor, Yannick van 14 jaor. Ouch Jesse zit op voetbal: in de E1 van SHH. Game op de playstation duit t'r ouch gaer. En es de sjtroom is oetgevalle, ouch boete sjepele. Jesse haet 'ne knien en twee veugel en wilt eigelik ouch nog waal 'ne hõndj. Veur lekker aete geit Jesse 't leefs nao 't Mexicaans restaurant El Sotano aan de Kraanpaort. Hae verheug zich op d'n optoch en de Sjtasiefestatie en vindj het super leuk óm adjudant te moge zien van Toss I.



**Adjudant Eunice Hamers**, de enige dame in 't gezelsjap, is in het Remunjse ziekehoes gebaore op 13 november 2003 en is noe dus 1x11 jaor. Eunice geit... ouch nao de Sjteine Brök en zit ouch in groep 8 bij meester Han. Voetballe leut 't aan de jõnges euver. Eunice vindj hokkie vää! leuker. 't Sjeelt in de D5 van Concordia. Anger hobbies van Eunice zeen boete sjepele en ziene knien Semmy. Van al det sjporte en sjepele kriegs se hõnger en dan wilt Eunice 't leefste pizza. Zien pap en mam zeen Paul II+II Hamers en Monique de Bock. Mam haet vreuger bij de Jeuggarde gedans en pap waas in 1979 Jeugprins van D'n Uul en in 2005 grote Prins van D'n Uul. Hae haet ouch nog jaore langk meziek gemaak bij de Prinsekepel. Eunice haet nog 2 ajer breurs, Juul van 13 jaor en Loek van 14 jaor. Eunice vindj 't heel bezõnjer óm es maedje same mit Sem en Jesse adjudant te zien van Toss I.



Alles bie jein 'n bezõnjer Uule gezelsjap. 't Voetballe, D'n Uul, Remunj en femieliej zeen de binjende deile van 't jeugprinselik gezelsjap en ouch van de eljers van det gezelsjap. Zelfs versjillende opa's en oma's hõbbe heel vää! beteikend veur D'n Uul (kiek mer ins wiejer in dit blaad). Met dees 'Veer Veer' kump 't dus waal good dees daag. Veer winse häör dan ouch heel vää! plezeer en 'n sjitterend vastelaovessezoen! En dat alles ónger häöre sjpreuk: **VEER VEER D'R TOSSE IN!**



veer  
**TOSS** D'12 Eerste

Sjtadsjeugprins van Remunj.  
Biej de grasiej van Sjtads vastelaovestvereniging On tuul in 't jaor 2015. Gebaore mitte  
in de sjtad en waal op 't sjoone Munsterplein. En noew wouende aan  
't voetbalveldj in Heerte. Zoon van Aad-Sjtadsprins Danny I en  
Janine. Breur ke van Beau Aad-Sjtadsjeugprins  
Goof I en Loek. Gaeve uch hiejbiej  
te kinne en te versjtaon:

- 1 det tuuleprins miene grötote wins is in eindelijk oetkump
- 2 det ich sjtielikum haop det ich ouch nao de vrouwluij-zitting moog
- 3 det veer 't baster zölle doon es oos elders  
+det veer t allein doon mit os veere
- 5 det veer heel gaer nao 't verkebal wille gaon maarnog get jäärkes motte wachte
- 6 det veer suveral zölle zeen wo det get te doon is
- 7 det veer 't sjoel zölle sjele wiej 't zich heert
- 8 det veer uch kinne zögke, ouch mit liemenaad waert 't laat
- 9 det veer allemaal op de sjtains brök zitte
- 10 det veer zölle sjtraole op de optochwege
- 11 det veer op 't les van de vastelaovend ein verrassing vour uch höbbe  
dit alles önger oze liefsjpreuk:

VEER VEER

D'R <sup>12</sup>Tosse <sup>12</sup>in!  




Zondaag 11 jannewarie 2015

# Grotekerke

## van (aad)jeugprinse mit häör adjudante



2012 Rik I en adjudante  
Dante en Mees



2013 Damiaan I en adjudante  
Jules en Jort

7



2014 Sem I, adjudante Rutger  
en Christophe en Prinselike  
Assistent Renske

Kiek veur de foto's van de ajere  
aad jeugprinse en häör adjudante  
en ouch veur de interviews op  
[www.dn-uul.nl](http://www.dn-uul.nl)

# De magie van Goochele



## 'n interview mit 'ne echte goocheleer: Leonard

Miene eige naam is Leonard en ich bön 'ne goocheleer ofwaal 'ne illusionis, daoróm is miene artiestenaam 'leonardillusions'. Op feesjes biejeurbeeld loup ich tösse 't pebliek door mit kaarte, muntje en anger klein dinger en dao doon ich dan truuks of illusies mit. Mein eige theaterveursjtèlling hit 'Liefde voor het donker' ofwaal 'Leefde veur 't duuster'. Dae naam is óntsjaon doordet ich mich afvroog: "Waat is goochele? Waat is magie?". Goochele en magie waere döks gezeen es dónker, duuster en dus sjelech. Magie is 't sjoonste deil van 't duuster. En det sjoonste det is de leefde. Leefde veur 't duuster! In de show kómbineer ich goochelkuns, meziek, vertèlle en kleinkuns.

### Wooróm bös se gaon goochele?

Op mien werk zoot ich dök te wachte achter de computer toet det ich wiejer kós. Daoróm zóch ich get óm tössedoor mit bezig te kinne zeen. Nao 'n show van Hans Klok kwaan ich aan de kal mit 'ne agere fan en dae bleek goocheleer te zeen. Hae zei: "Ein goocheltruuk is biejnao 't zelfde es jónglere. 't Enige versjil is des se bie jónglere alles kins zeen en bie 'n goocheltruuk neet." Nao det gesjprek mit dae goochelee dach ich: "Ich gaon 't probere!" En via internet koch ich mien eerste book en ein sjele kaarte.

In 't dageliks laeve loupe miense veurbieje aan magische dinger. Ich wil häör de uig äöpen. Ich geluif in magie: vlinders in diene boek es se verleeft bös, van dich zelf lere sjnappe wooróm des se sommige dinger op 'n bepaalde meneer duis, de reiger dae ich óngerwaeg altied zeen en dae edere keer naeve dae visser sjeit.



## Welke kleijer höbs se aan es se goochels?

Ich höb in eder geval gein tesse mit 'ne döbbele baom in mien kleijer, want 't is magie. Ich vinj des se in eder bōks of jas mōs kinne goochele. Vanaaf 't moment des se opsjteis, toet des se geis sjlaope: touveneer bōs se!

## Waat is dien bèste truuk?

Eigelik vinj ich al mien truuks leuk en belangriek. Ein truuk doon ich altied. Diej kump oet mien eerste book van wiej ich net begōs mit goochele. D'r zeen ouch truuks diej ich neet doon. Biejveurbeeld mit beeste. Beeste zeen leuk, mer ich wirk allein, zōnger assistent. En dan zōl zo'n bees de ganse tied örges óngemekkelik zitte wachte; det is zielig. 'n Óntsnappingstruuk zōl ich neet doon, want det vinj ich neet magisch. Ich zaeg ouch nemes door midde, want det pas neet bij mich. Ich zeuk altied 'n truuk mit 'n verhaal det bij mich pas. 'n Truuk is wiej 'n gerech mit ingrediënte: doe veurs allerlei hanjeling oet, sjakels óngerdeile aanein, oefens 't resepe, versiers de taofel en dan serveers se 't gerech.

## Waat is diene touversjpreuk?

Ich höb geine touversjpreuk... Ich gebroek 'ne zogeneumde 'katalysator'. Es se biejveurbeeld get in 'n deuske duis, is 't weg; det is gein magie. Es se d'r op tiks, 'n geluid maaks, en dus iets duis óm 't veurwerp weer te laote versjiene, dan is 't magisch. Det geluid of det tikske neums se ouch waal de 'katalysator'. Det kins se op vööl menere doon. 't Geheim van 'n gesjlaagde truuk is veur 'n heel klein deil oefening en veur 'n heel groot deil de bewaeging. 't Is heel belangriek det diej bewaeging netuurlik euver kump.

## Wiej lang duis se d'r euver óm een truuk good oet te kinne veure?

Det wisselt per truuk. Ich höb biejveurbeeld drij maondj langk óngerwaeges in de bōs nao 't werk, 't sjpreije van kaarte van links nao rechts ge oefend. Es se wils mitdoon aan de goochelkampioensjappe, mōs se 'n show van 10 minute höbbe. Veur des se diej 10 minute in ein gezat höbs, kins se waal 1 toet 3 jaor bezig zeen mit oefene, oefene, oefene...

## Höbs se nog 'n paar henjige tips veur ós?

Koup dien eerste setje muntje, kaarte, belkes en ein book. Zeuk dich iventueel eine mentor, emes dae dich kin helpe. Höb vööl gedöld en gank nog meer oefene, oefene, oefene...

*Wils se 'n truuk van Leonard zeen?*

*Scan dan dees bladzeij of gank nao <http://tinyurl.com/truukse>.*



# SJPORTIEVE MAEDJES

WIS GEER DET 'T DANSE BIEJ DE GARDES VAN D'N UUL EIGELIK 'T ZELFDE IS ES SJPORTE BIEJ CONCORDIA OF OIKOS OF SHH OF..... DE GARDEMAEDJES TRAINE OUCH EIN GANS SEZOEN. VANAAF BEGIN SEPTEMBER TOET AAN 'T OETROPE VAN DE JEUGPRINS. EDER WAEK GAON ZE DIEK 'N OER AAN 'M IN DANS SJUDIO 'T WITTE KIRKSKE. EN ZJWEITE DET ZE DAN DOONI! ZO VÄÖL, DET D'R MIT DE OPTRAEJES BIEJ D'N UUL (BIEJNAO) GEIN DRÖPPELKE ZJWEIT MEER TE ZEEN IS. HIEJ ÖNGER SJTËLLE VEER DE SJPORTIEVE MAEDJES VAN D'N UUL AAN UCH VEUR.

## D'N UUL JEUGGARDE



MIETZIE HENDRIX  
LEIDSTER



FON CUSTERS  
ASSISTENTE/TRAINSTER



FABIANA PRESTIGIACOMO  
TRAINSTER



MAUD VERSTAPPEN



BENTHE NUWENHUIS



LUNA LAMBRIEX



MARIJN GEURTZ



BO VAN RIJT



INDY EVERS



LISA WILLEMSEN



FLEUR VAN DER VARST



DENE RONCKEN



DAPHNE VAN ELVEN



KATJA BOERSMA

SHOWDANS OP  
ALGO ME GUSTA  
DE TI VAN  
WISIN & YANDEL  
FEATURING CHRIS  
BROWN & T-PAIN



# D'N UUL KIENJERGARDE



CARLA KLAVER  
LEIDSTER



DAGMAR CILLEKENS  
LEIDSTER



INGRID BREUGELMANS  
TRAINSTER



NIENKE WASSENBERG  
TRAINSTER



EVIE BOERSMA



LUCA MANDERS



PUK TROMP



MAUD VAN ETTEN



NOOR VAN DER VARST



ZOË VAN ASTEN



BIBI FRENCKEN



JENNA JAMBROERS



SOPHIE OPHEIJ



CHARLOTTE SCHMITZ



NINA VAN ETTEN



VIENNA PRESTIGIACOMO



ELISA PRESTIGIACOMO

GARDEDANS  
OP PIRATE VAN  
KASSALA



# Hutsel-de-frutsel

D'R WAERT 'N MAGISCH FIGUUR GEKNUTSELD

Waat gaon veer make? Is 't de Hulk? Is 't Frankenstein? Is 't ...?  
Laot eur fantasie wirke en laot ouch de netuur zien werk doen.  
Sjpraek edere daag te touversjpreuk oet:

*"Hutsel-de-frutsel, d'r waert ein magisch figuur geknutseld"*

Höb gedöld en haaj vól. Maak mit Half Vaste 'n sjoon foto en sjtuur diej op nao Juulke.

*'t is magisch!*

## EERS GET GEREI VERZAMELE:

- 1 blik (de soep of beunkes eers op aete!)
- 2 sjroeve (± 3-4 cm)
- hamer
- greun verf
- sjöölke / bördje óm de verf op te doen
- verfkwas
- 'n velke zjwart pepier
- sjeer
- 2 wiebeluig
- liem
- zjwarte sjtif
- sjroevedrejjer
- sjöpke
- potaerd
- graaszaod



## EN DAN GEIS SE GOOCHELE:

1. houw aan weerskenj van 't blik óngeraan 'n gaetje (laot pap of mam aeve helpe)
2. verf 't blik greun en laot de verf dreuge
3. knip óngerwieles oet 't zzwarte pepier 'ne sjtrook mit driekentjige hepkes; dae sjtrook mó't minstes aeve langk zeen es det 't blik rón dj is...
4. is de verf nog neet dreug? Kiek dan heel gedöldig en good wiej det geit; det is magisch!
5. plek de wiebeluig op 't blik
6. plek dae zzwarte sjtrook haor op 't blik
7. teiken mit de zzwarte sjtif 'n naas en 'ne móndj
8. drej de sjroeve in de gaetjes
9. vul 't blik toet biejnao aan de randj mit potaerd
10. zej 't graas op d'n aerd
11. gaef dit magisch menke aaf en toe get water en wach.... toet Half Vaste  
Es 'm 't water bije de sjruufkes oet de nek löp, haet d'r aeve geine dórs meer!



# Magie, zit ouch in... Beuk!

Goochele is netuurlik magisch. Mer ouch 'n fees kin magisch zeen. Waat dach geer van Kersmis? Versieringe in hoes en in de sjtad mit sjlingers en lempkes, lekker wanjele door de sjnee. En netuurlik vastelaovend! Mit kienjer diej sjoon verkleid en net gesjmienk zeen en zich köstelik ammezere. Mer weit geer waat veural heel magisch kin zeen? Verhaole! En de meiste verhaole sjtaon gesjreve in beuk! Diej verhaole kinne veurgelaeze waere, mer diej kins se netuurlik ouch zelf laeze. In alle gevalle zal ederein zelf mit zien eige fantasie zich 'n beeld vorme bie 't verhaol. En det is magisch!

'n Book betouvert de laezer dus. Want 't book leut dich fantasere. Wiej zeen de persone in 't book d'r oef? Wiej zuut de ómgaeving wo ziej laeve d'r oef? En es verhaole waere veurgelaeze, dan zitte de loestereers heel dök mit aoepé móndj en mit grote uig te loestere. 'n Book kin d'r ouch veur zorge des se geis lache, of zelfs des se mós janke. D'r zeen zelfs beuk wo se get van leers! Haha! Wiej knap is det allemaal?

De grótste 'bookwinkel' daet geer kint is netuurlik de bie. Dao kins se heel vööl beuk lene en ouch in 'n heukske zitte laeze. Mer dao moogs se neet keihel



lache! Veur de rès zeen d'r sjteeds minder bookwinkels. Zelf de hele bekinde Remunjse winkel mit tweedehands beuk 't Ezelsoortje is gesjtop. Nao 3x11 jaar; det is dan toch waal nog ein bietje magisch. En de winkels diej euver blieve mótte oppe sente lètte en hóbbe daoróm dök heel weinig sfeer. Geine magie. Det is jaomer.

Gelökkig besjteit in (groot) Remunj waal nog 'ne bookwinkel wo se geliek es se binne kums al betouverd waers. 't Is net es of se 'n sjprookje binne löps. 't Is 'ne knusse, gezellige en veural magische winkel. Ze hóbbe beuk veur alle laef-tieje, mer veural veur peuters en kienjer van de basissjole. Dae winkel hit 'De kleine Tovenaar'. Deze naam is bedach door de dochter van de eigenaresse. Det maedje had zelf 'n plaetjesboek geknutseld mit dao in 'n klein pupke mit 'n puntjmöts. Biej diej plaetjes fantaseerde 't ter plekke 'n verhaol euver 'de kleine Tovenaar'. En es noe de winkel biejevurbeeld somers gesjlaote is, hingk d'r 'n briefke aan de deur: "de kleine Tovenaar is op vakantie".

Verhaole kins se laeze, doe kins d'r nao loestere en me kin d'r ouch nao kieke. Dink mer aan 'n póppejspel mit handjóppe of marionette. De veursjtèlling van de Kienjermusical geit dit jaor ouch euver póppekaspóppe. En in Remunj waert eder jaor biej de Rattetore 't Vertèlfestival en Póppe theater georganizeerd. Gaot dao mer ins loestere en kieke. Zo'n póppejspel is namelik ouch magisch, want de miense loestere en kieke nao de pop. Ze hóbbe neet ins meer in de gate det d'r 'ne man of vrouw achter of ónger de póp zit. Sjepeelt geer zelf toes waal ins mit Jan van Klaose, Ketrien en de Prinses of de Veldjwachter?

Bezig zeen mit taal is belangriek. Daoróm waert veur uch ouch dezen Uulewapper gemaak. Dus gaot nao de biebel óm beuk te lene. Of nao 'ne bookwinkel in de sjtad óm beuk te koupe. Of gaot nao 'De kleine Tovenaar' (dae later dit jaor 1x11 jaor besjteit !) veur beuk of óm te loestere op ein van de maondjelijke veurlaesmorges.

Gans nuuj zeen interaktieve beuk. Veur 't book 'Een koffer vol geld' zeen d'r in 't landj zelfs echte koffers versjtop. D'r zeen beuk wo se 'ne app biej kins downloade. En d'r zeen beuk mit truukkes, zo wiej ouch in dit blaad, diej ze mit de layar-app kins bekieke. Gans moderne touveneriej dus. Ein veurbeeld van 'n gjerwèts betouverende book is 'Jiet Kleine theater van Rebecca'. In dit book is eder bladzej 'n oetgesjneje plaetje. Laot Juulke ins weite welke beuk det geer gaer laes.



# Sjnapnaaze ★ bal ★

**Vastelaoveszaoterdaag  
toet en mit vastelaovesdinsdaag  
14, 15, 16 en 17 fibberwarie  
Thema: Frozen**

Zaoterdaag toet en mit maondaag in  
† Witte Kirkske van 16.00 toet 20.00 oer.

Op dinsdaag in 't Witte Kirkske rónjdjóm  
't aaftraeje van de Sjtadsjeugprins  
van 14.30 toet taege 17.30 oer.



Veur alle kienjer van 0 toet 'n jaor of 12, mer  
breurkes en zösterkes, papa's, mama's, opa's  
en oma's moge netuurlik ouch kómme.

D'r is ouch van alles te koup: sjieps, sjlók,  
frisdrank, breudjes knak/frikadel en tosties.



# Ha-he-ho-hummie

VEER MAKE EIN GANSE FEMIELIEJ MUMMIE

Geer kint mesjiens waal de film Dummie de Mummie. Juulke haet al zien magische krachte aangerope óm ketak te make mit de enige echte

*Darwishi Ur-atum Msamaki Minkabh Ishaq Eboni.*

Juulke haet `m gevraag óm ein knutsel iedee te make; gans en allein veur uch!

## DEES SPULLE GHEB JIJ NODIG:

- `n paar glaze pötjes (de Olvarit eers door breurke of zösterke laote op aete !)
- waxine-kaerskes (‘t veiligste zeen diej mit ‘n batteriej)
- `n rólke verbandj of sjiljersplekbandj
- `n sjeer
- wiebeluig
- liem
- `n velke pepier

## EN NOE GHAAN JIJ JE EIGEN MUMMIE FEMIELIEJ KNUTSELEN

1. maak de pötjes aeve zuver es d’r nog Olvarit in zit
2. knip `n deil lang sjtroke verbandj aaf
3. sjmeer de pötjes ein veur ein vol mit pleksel
4. drej dan ‘t verbandj óm de pötjes; van ónger nao baove en mesjien nog ins ‘n sjtök truuk
5. plek de uig op ‘t verbandj
6. knip oet ‘t vel pepier twee eurkes en ‘n sjtèl vleugels; sjtaek de eurkes achter ‘t verbandj en plek de vleugels oppe rök
7. doot in eder pötje ‘n kaerske (neet zelf de kaerskes aansjtaeke !)
8. doot ‘t leech in de kamer oet en de gerdjene toe en...

*'t is magisch!*



# Elfes zeen neet altied elfes\*\*\*

In de waereld van magie kómme magische figure veur. Bijveurbeeld elfes. Det zeen van diej prachtige, betouverende, wánjerlike waezes. Ein elfje kan ouch 'n kórt gedich zeen. Ouch diej zeen prachtig, betouverend en wánjerlik. Zeker es se dit euver leuts aan de kienjer van de Hubertussjool oet Hertel. Veer höbbe 'n toet 1x11 beperkte seleksie aafgedrök. Geneet mit ós mit!



Goochele  
touvere, verdwiene  
cape, touverhood,  
touverstaaf  
't is heel raar  
foetsiel!

**Jip Coax - Za**



Magie  
betouvert alles  
waas se verzins  
mit dien eige fantasie  
boem

**Tafke Bens  
Zb**



Magic  
waat blij  
mit alle kleure  
leut magie zich heure  
magic

**Sil Passage - Ba**

Magie  
betouvert dich  
sjpreukewaereld mit plezeer  
doe waers helemaal mitgenaome  
ALAAF!

**Elise Ogrinc - Zb**



Magie  
betouvert carnaval  
es eine baas  
ich vinj 't spectaculair  
carnavalstouveneer

**Senna Eier - '7b**



Einhaorn  
vriëj zeen  
wit raoze gael  
magisch betouverend  
sjoon sjitterend  
sjprankel

**Zelta Lu - '7a**



Touvere  
de's leuk  
'n bietje magie  
det mós se kinne  
touverstaaf!!

**Alke Bouwels - '7ab**



Limburg  
miense verkleije  
feeste, lol, plezeer  
dao drejt 't óm  
alaaf

**Wax Kanters - '8a**



Magie  
magisch, verkleije  
hood, cape, laarze  
'ns lekker magisch doon  
mysterie!

**Garniel Smeets - '7a**

vastelaovend  
alles doon  
gek, raar, leuk  
doon waas se wils  
alaaf!

**Umke Beeren - '8a**



vastelaovend  
feeste, verkleije  
gek doon, alaaf  
sjpringe, meziek, prins, cool  
gezellig

**Wax Theunissen - '8a**



# DE VASTELAOV

Op zóndaag 8 fibberwarie 2015 is 't weer zo wied: de kienjermiddaag waert weer opgeveurd. "Jao mer", zólle d'r ein paar van uch noe dinke, "det hit noe toch Kienjermusical?" Det klop. Mer dae angere naam is d'r veural veur óm meer miense nao de veurstjèlling te kriege. Vävöl miense vinje musicals leuk, mer weite neet det d'r in de Kienjermiddaag ouch 'ne houp leedjes waere gezónge.

In dezen tied zeen d'r döks discussies euver waat d'r allemaol mit aaj tradities mótt gebeure. Noe is d'r in Remunj eine aksiegroep opgesjtange dae taegede vastelaovend is! Tsss... 't mótt neet gekker waere! Deze groep vindj det de vastelaovend mótt verdwiene; dae ónzin mit det sjmienke en verkleije en plezeer make kint volges häör ech neet meer. Mer dao is netuurlik neet ederein 't mit ins... Eine póppekas sjpeler betouvert zien póppe en die mótte op zeuk nao de vastelaovesgeis. Wiej magisch is det? De vastelaovesgeis is ein geveul, en det geveul besjteit oet 3 óngerdeile: de vriejheid, 't plezeer en de verbónjehed.

Waat mótt d'r noe gebeure? Wo mótte diej póppe op zeuk gaon? En zólle ze de vastelaovend kinne redde? Vinje ze de vastelaovesgeis? Waat 'ne houp vraage. En dan höbs se nog Bluts en Blutske. Nou, dan höbs se mich get; diej twee zólle de vastelaovend waal efkes gaon redde... dinke ze... De vastelaovesdaag kómme sjteeds dichter bie... ojee ojee... zal de vastelaovend noe verdwiene?

Gank allemaol kieke of de vastelaovend nog te redde is. Same mit femieliej, vrunj of kienjer oet de buurt. Nao aflouping kint ederein in de Salle de Fête nog gezellig get drinke en vertèlle waat d'r vónj van De Vastelaovesgeis.



# ESGEIS

Aan de Kienjermusical doon weer vööl kienjer mit van sjloe oet Remunj en dao boete. D'r zeen akteurs en netuurlik: zengers! Mer ouch dansers van Britt Roemen's Basics Dance Studio en ós eige Jeuggarde. En trómmeleers van Drums 4 Fanatics. Same bringe diej uch 't verhaol det is gesjreve door Ton Il Nizet. De leedjes zeen gesjreve door Marie-Anne Breuer en Ceryll Aubert. Dus koup allemaol 'n kaartje en laot uch betouvere door de Vastelaovesgeis...

Ein traditie waert in eder geval nog in ere gehaje. En det is 't sjlótleed det heel vreuger al gezónge waerde bieje de Kienjermiddaag van D'n Uul: Hiej is vastelaovend! Teks en meziek zeen van Minnesjtreet van D'n Uul Naud Reyners. Hiej ónger sjeit de teks, zodet geer kint rippetere!

## Kienjermusical D'n Uul De Vastelaovesgeis

8 fibberwarie 2015 | Antree 9 euro  
Aanvank 13.30 oer en 15.30 oer  
Theaterzaal de Oranjerie

Nao de veursjtèlling fees in de Salle de Fête  
Antreecaarte te koup bieje de theaterkassa  
en via de website van de Oranjerie



## HIEJ IS VASTELAOVEND

Refrein:

Mer hiej is Vastelaovend,  
jao hiej kan 't neet op.  
Van de morgje toet d'n aovend,  
sjeit 't hele gedoons oppe kop.  
Lai-la, lai-la, 't is eine grote hoempapa.  
Lai-la, lai-la, 't is eine óngerein.

In 't werme Akapoelko,  
löp me noe nog aan 't sjtrandj.  
Zjweite doon ze zich te barste,  
mit ein muulke det ram is verbrandj.

Refrein

In 't kaje Lillehammer,  
drink m'n noe nog heite thee.  
Ózel lieje doon ze duchtig,  
mit dae thee zits se deep in de sjnee.

Refrein 3x



[www.facebook.com/kienjermiddaag.dnuul](http://www.facebook.com/kienjermiddaag.dnuul)

# Een magisch

## Óntmoeting Noud I & Sem I



't Aafgeloupe seizoen vierde Sjtadsvastelaovesvereniging D'n Uul zien 7 x 11 jubeleijem. Ein fees waat nemes kin zeen óntgaon en waat veer mit z'n alle groots gevierd hóbbe. In zo'n jubeleijemjaor gebeure der soms heel bezónjer dinger, zelfs heel magische...

Zo vertèlde mevrouw Tanja Brinxma ós det háäre ome oijt d'n eerste Jeugprins van D'n Uul is gewaes. Det waas Noud van Vlodrop. Noud I waas Jeugprins in 1954 en is noe mer leefs 72 jaar jónk! Tanja vroeg zich aaf of 't meugelik zól zeen

óm 'n treffe te regele tösse de eerste Jeugprins Noud I en de op det moment lèste Jeugprins Sem I. Netuurlík kós det geregeld waere! Op eine goje zaoterdaag waas 't zo wied. Noud en Sem hadde aafgesjpraake in 't Uulenés, wó anders? Sjpannend! Want wie is Noud? En... wiej zuut hae d'r taegewaardig oef? Want veer kinnen hem waal van de foto op de website, mer ja, diej is al 60 jaar aad!

Gelökkig waas 't veur Noud mekkelik óm Sem te herkinne in 't boemvolle Uulenès. De twee Aad Jeugprinse sjtèlde zich aan ein veur en ónger 't genot van 'n lekker glaeske limmenaad raakte ze al flot aan de kal. Noud vertèlde euver wiej hae Jeugprins waas gewaore en wiej det 't d'r in ziene tied aan toe ging. Zien mam had namelijk bedach det 't waal sjoon zól zeen es d'r eine Jeugprins zól zeen veur de kienjer van D'n Uul. Zo gezag, zo gedaon. Ein pak en de môts waerde al rap door zien mam gemaak en hup, Noud I ging mit in d'n optoch. Hae moch toen same mit zien gevolg, de Sjnótkuukes, op de wage van de grote Prins Twan I.



# treffe

Toen Sem vertèlde wiej det 't d'r in 2014 aan toe geit, veel Noud van de ein verbazing in de anger. 'n Resepsiej mit kedoos? Jeugprinselik verveur? Optraejes oppe Sjolefestasie en oppe Sjtasiefestasie? En mit 'ne eigese wage mit in d'n optoch? 't Mót neet gekker waere dach Noud. Hae waas kómpleet verras!

Oere langk bleve diej twee Aad Jeugprinse aan de kal. Zo vööl hadde ziej zich te vertèlle. 't Leek es of de tied aeve sjtil waas blieve sjtaon. Ôndanks det Noud zo get aeve aad is es de opa van Sem.



**pap Paul II**

Aad Jeugprins (1997)  
Aad Prins (2005)  
Lid gewaes van  
de Prinsekepel



**mam Monique**

Danseres bie  
de Jeuggarde



**opa Thei III**

Aad Prins (1974)  
Erelid van D'n Uul



**oma Rietje**

Héél vööl jaor de  
Kienjermiddaag  
georganiseerd  
Erelid van D'n Uul

**oma Lia**

Eredame  
van D'n Uul



**opa Jo**

Grootmeister  
van D'n Uul



**mam Vivian**

Danseres bie de Kienjer- en Jeuggarde



**pap Jeroen (2005)**

Aad Adjutant van Paul II  
Aad lid van de Technische Commissie



**pap Danny I**  
Aad Prins (2009)



**broor Goof I**  
2x Aad Jeugprins  
(SHH: 2009  
D'n Uul: 2011)



**mam Janine**  
Maedje oet 't riek van ós vrunj  
van D'n Oeles oet Tegele



**mam Françoise**  
Aktriese bij de  
Kienjermiddag



**pap Roland**  
DJ Rolo



**opa Harry**  
eigeneer van  
Vastelaoveskefee  
De Verleiding



**opa Paul**  
Mit de Mesjeus  
(Remunjse zanggroep  
dae neef meer besjeit)  
Uulesjlager 1984 - Lamoererats



**grootopa Pierre**  
Haet Sjinderhannes en  
Schwarze Peter gesjeeld  
Uulesjlager 1950 - Munsterpleinwals

# Sjmikke! Sjmakke! Sjmulle!

## Veer gaon ós buukske lekker vulle!

Wils se pap of mam op zaoterdaagmiddaag ins verwinne? Maak dan same 'n lekker soupke klaor. Neet ein oet blik of oet 'n pak! Nae, ein lekker verse soep. Zo'n dieke wó de laepel rech op in blief sjtaon. Mmmmm...heerlik!! Laot veer mich weite wiej det ze uch gesjmaak haet?

### Dit höb geer allemaol neudig:

- 'n pompoen
- 2 oje
- 'n paepermeule mit graove paeper
- 2 blökskes kippebouillon
- kluntje bötter
- 1 liter water
- grote pan
- sniejplank
- groot sniejmets
- klein sniejmets
- magnetron
- magnetron folie
- 2 depe borde
- pollaepel
- (sjtaaf)mikser
- maatbaeker
- aetlaepel



## De pompoen gereid make

Was eers dien henj. Sjnij (same mit pap of mam) de pompoen mit 'n groot sijnemets door de mitte. Haol mit de aetlaepel de zäädjes oet de pompoen. Diej kinne bieje 't GFT aafval. Ligk de twee halve pompoene eder op 'n deep bord. Doot d'r magnetronfolie euver haer en zit ze 1x11 minute in de magnetron op 700 Watt. Dan waert de pompoen zaach en kins se de sjaal d'r gemakkelik vanaaf haole. Let op det de pompoen heit is es se ze oet de magnetron haols en es se de magnetronfolie d'r van aaf haols! Laot de pompoen daoróm eers get aafkeule veur des se ze geis oetlaepele. Laepel mit d'n aetlaepel 't vruchvleis oet de pompoen. De sjaal kin ouch bieje 't GFT aafval.

## De soep klaor make

Sjël de oje mit 't kleine sijnemets en sijnij ze in klein sjtökskes. Zit de pan op 't fernuus en vergaet de pit neet aan te zitte. Zit de wasemkap ouch mer aan taegede rouk en de reuk. Sijnij 'n kluntje bötter aaf en laot det sjmiltje in de pan. Doot de sjtökskes ooj in de pan en laot ze glazig waere, neet broen. Dan kin d'r 'ne halve liter water bieje en de twee blökskes kippebouillon. Effe reure en dan kin 't pompoenvleis in de pan. En doot dan ouch d'n angere halve liter water in de pan d'r bieje. Drej 't 'vuur' leeg en laot de soep óngeveer vieftien minute pruttele mit de deksel oppe pan.

Zo, noe höbs se aeve tied óm de zoj in de keuke op te ruime. En neet vergaete óm tössedoor aaf en toe met de pollaepel in de soep te reure!

## De 'finishing touch'

Zit de kaetel (veurzichtig!) aeve op 'ne óngerzitter op d'n aanrèk en miks de soep mit de sjaafmikser. Drej noe 1x11 keer met de paepermeule baove de soep en reur de paeper mit geveul good door. Es de pollaepel noe net rech op in de soep blief sjaon, is ze good. Liek 't waal moeremoos, doot d'r dan nog get water bieje. Biej 't servere kins se d'r get roum in doon en 'n tekske peterselie d'r op.

# Sjmakelik aete!



### Magisch...

- Pak 'n raekenapparaat.
- Bedink 'n getal van driej siefers mer gein '0' (biejveurbeeld 253).
- Sjrief det getal twee keer achterein (mit 't veurbeeld: 253253).
  - Deil 't getal eers door 7.
  - Deil 't nuje getal noe door 11.
  - En deil det getal door 13.

*Tadaaah! Magie!*

# MÓPPE EN ZO...



## Raodsel

't Is verkaajd en  
kan touvere?

Harry Snoffer



## Pappegej van de goocheleer

Op 'n groot cruise-sjeep wirk 'n goocheleer. Hae haet 'ne sjeike, felgekleurde pappegej. Dae haet aevel 'n groot naodeil: hae verklap altied alle goocheltruuks. Biej ein van zien shows leet de goocheleer biejeurbeeld 'n horloge verdwiene en toen reep de pappegej "In ziene moew! In ziene moew!". Op 'ne kwaoje daag zink 't sjeep. De goocheleer en de pappegej sjpringe nog net op tied van baord en drieve op 'n sjtök hout in de oceaon. Nao oere sjtilte zaet de pappegej in ins: "Oké. Ich gaef 't op. Wo höbs se 't sjeep gelaote??"

## Achteroet

Vreug 'n jungske aan en aaj heks: "Wiej aad zeet geer eigelik?"  
Wo op diej heks antwaort: "Euhm... aeve dinke... 't Veurig jaor waerde ich 99 en dit jaor waer ich d'r dan dus 94." Det jungske is neet dom en zaet: "Mer mevrouw de heks, det kloep toch neet? Es geer veurig jaor 99 waerde, dan waert geer dit jaor toch 100?" Zaet diej heks weer: "Kins se nao gaon wiej hël ich achteroet gaon!"



## Jean Gouders

bedank veur al  
dien Juulkes!



# Magische sjpreuketoch!

**Juulke haet veur uch 'ne magische sjpreuke-  
toch inein gefispermuld. Det is 'ne sjpeurtoch  
nao allemaol lètters die same 'ne sjpreuk  
vorme. Of baeter, die same 't eerste deil  
vorme van eure eige sjpreuk!**

Vanaaf 11 jannewarie ('t oetrope van oze nuje Jeugprins) toet en mit 24 jannewarie (de resepsie van oze Jeugprins) kint geer op zeuk nao verborge lètters. Diej zeen versjtop in de etalaasj van inkele winkels in de binnesjtad van Remunj en in deze Uulewapper.

In de winkel etalages kint geer de kaarte mit de lètters herkinne aan 't Juulke logo. Op eder kaart sjeit 'n lètter en 'n nummer. Es se biejeurbeeld in 'ne winkel 'n kaart vinjs mit de letter "J" en 't nummer "11" dan sjriefs se hiej ónger diej lètter "J" in vekske 11. Det is mekkelik toch?

Same vorme de lètters 't eerste deil van 'n zin. Geer moog deze 'sjlaagzin' aafmake; in 't Remunjs netuurlik. Sjtuur eure sjpreuk veur 24 jannewarie om 11.11 oer nao uulewapper@dn-uul.nl. Degene dae volges de riddaksie van de Uulewapper de sjiekste, sjoonste, bèste sjpreuk haet ingestuurd, dae krieg eine hele gave grote pries!



De prijsoetreiking van deze sjpreuketoch-sjlaagzin-wed-sjtried is op 1 fibberwarie oppe resepsie van oze Jeugprins. Diej resepsie is vanaaf 13.00 oer in 't Witte Kirkske. Let good op: allein es se oppe resepsie aanwezig bös maaks se kans op dae hele gave grote prijs. Dus verzamel de lètters in deze Uulewapper en in de winkel etalages, los de puzzel op, maak 'ne sjlaagzin en sjtuur dae op!



# De sjpreuk:

1	2	3	4	5	6	7	8	9

10	11	12

13	14	15

16	17	18

19	20	21	22	23

24	25

26	27	28	29	30	31	32

33	34	35	36



# DÖBBELINTERVIEW

## PRINS VAN D'N UUL MARTIJN I

### **Waes 't al ooit eure druime óm Prins te waere?**

Ich had nooit durve druime det ze mich zólle vraage. Van jónks aaf aan vier ich al vastelaovend. Toen ich op de basissjool zoot waerde ich adjudant van Mark II. Det vónj ich al ongeluifelik sjoon! Det ich dit jaor Prins van de sjtad bôn, dao zal ich zeker nog heel lang euver blieve druime... es geer det met weit!!

### **Gaot geer 't misse óm wiej anger jaore mit al eur vrunj vastelaovend te viere?**

Allereers zeen mien beste vrunj mien adjudante en zie zólle dus alle daag aan mien ziej sjtaon. Mien angere vrunj zal ich in mien vrieje uurkes opzeuke. Dit jaor is mien breurke d'r neef bie, want hae is op rondreis in Azie. Hem zal ich waal gaon misse.

### **Es ich magische krachte had, dan zól ich...**

Mit edere vastelaovend de zón laote sjiene en bie ederein de kater laote verdwiene (en dan bedoel ich neef de katers oef Neel).

### **Nao welk vastelaoves ivvenement kiek geer 't meiste oet?**

Waat ein lestige vraag..! Ónger ós gezag hób ich zin in alles waat d'r geit kómmel! Ich vinj 't heel sjpannend en kin d'r bienao neef van sjlaope. Mer es ich dan ein dink mó't keze dan gaon ich veur de Sjtasiefestatatie, ómdet ich dan vanaaf de buun 20.000 vastelaovesvierders moog toesjpraeke.

### **Wiej zeet geer toet de keus van de leje van eur prinselik gezelsjap gekómme?**

Mien adjudante zeen Mark en Ivo. Mit dees twee jónges vier ich eder jaor vastelaovend en mit hää hób ich jaore same gehandjbal. Door de jaore haer hób ich mit hää eine super sjterke bandj opgeboewd. Veer weite waat veer aan ein hóbbe en zeen same ein good team!

### **Waat vindj geer 't meis biejzónjere óngerdeel van eur prinsepak?**

Eigelik zeen 't twee dinger: 't prinsekruuts en de móts. Dees twee zeen namelik speciaal veur mich óntworpe.

Op mien prinsekruuts sjtaon symbole die vertèlle waem ich bôn. Biejveurbeeld eine handjbal, ein prinsevear en de name van mien adjudante en mien vrundin. De móts hób ich zelf óntworpe en ich bôn d'r heel greuts op. Ich haop det geer 'm net zo sjoon vintj es ich.

### **Waat wilt geer de laezers van de Uulewap- per nog vertèlle?**

Det vastelaovend mit al zien sjoon kleure, muziek, lol en plezeer ónversjaonbaar is! Es geer net wie ich det geveul te pakke hób, dan zeen veer ónversjaonbaar!



# JEUGDPRINS VAN D'N UUL TOSS I



## **Waas 't al ooit eure druim óm Prins te waere?**

In 2009 waas miene pap grote Uuleprins. Ich vónj det geweldig en wól ouch gaer Uuleprins waere. Mer ich had gedach det ze mich nooit zólle vraoge, ómdet mien broor Goof in 2011 al Jeugdprins van D'n Uul waas gewaes.

## **Gaot geer 't misse óm wiej anger jaore mit al eur vrunj vastelaovend te viere?**

Det gaon ich helemaal neet misse, want mien adjudante zeen mien vrunj. Mit häör en mit häör eljers vier ich al heel get jaore same de vastelaovend en det is altied heel sjoon.

## **Es ich magische krachte had, dan zól ich...**

D'r veur zorge det ze mich euver 'n jaor of 20 vraoge óm grote Uuleprins te waere.

## **Nao welk vastelaoves ivvenement kiek geer 't meiste oet?**

Ich kiek 't meiste oet nao mien eige Kienjergarde en nao de Jeuggarde en de Damesgarde. Mer 't allermeiste kiek ich oet nao 't oetrope, de kirmes, d'n optoch, ..., ..

## **Wiej zeet geer toet de keus van de leje van eur prinselik gezelsjap gekómme?**


Eunice, Sem en Jesse zeen mien vrunj. Dus de keus waas rap gemaak!

## **Waat vindj geer 't meis bie zónjere óngerdeel van eur prinsepak?**

Ich höb geheard det d'r dit jaor veur 't eers 'ne Uul op 't Prinsepak sjeit. Det vinj ich waal heel erg bezónjer. En de prachtige vaere; moog ich diej ouch neume? (riddaksie: "jao det moog geer zeker")

## **Waat wilt geer de laezers van de Uulewapper nog vertèlle?**

Det ich d'r same mit mien adjudante alles aan zal doon óm d'r, mit ederen dae de vastelaovend leef haet, de sjoonste vastelaovend van te make dae 't ich guf!



# PRINSELIK SJTRIPVERHAOL

DE VEURBEREIJING

"POLSSENDJES  
TËLLE. HÖBBE  
VEER DER WAAL  
GENOG?"




ZEUKE ZE NUJE LEJE BIEJ DE RAOD VAN 11?



"JAO TUIMEL,  
DOE KINS OUCH  
BIEJ DE RAOD."

RECHS 2-3-4, LINKS 2-3-4

"AEVE GET GYM-  
OEFENINGE ÒM MIT  
DAE VASTELAOVEND  
TE KINNE DANSE EN  
SJRINGE!"



"ALLES GEREGLD  
EN DE MÖTS PAS.  
DUS FF TIED OM TE  
CHILLE!"



PAUZE!

VEER VEER D'R TOSSE IN.



"VEER VEER ZEEN D'R KLAOR  
VEUR: DE VASTELAOVEND  
KIN BEGINNE!"



# COLOFON

Hooftriddakteur:  
Juulke

Riddaksie:  
Damiaan Bertrams  
Roel Hendriks  
Sabine Koopman-Lyon

Mit dank aan:  
Erik Snoek  
Jan-Paul van Atteveld  
Jean Gouders  
Kienjer van Basissjool Hubertus  
Leonard van de Bor  
Mariëlle Jereskes  
Nicole Kleinen, De Kleine Tovenaar  
Ronald Klaver  
Ton II Nizet  
Jeugprins van D'n Uul 2015: Toss I  
Prins van D'n Uul 2015: Martijn I

Fotoos:  
Femielië Leijendeckers  
Femielië van Vlodrop  
Femielië van 't JPG  
Peter Kessels Fotografie  
Foto Studio Bongers  
Harry Allers  
Zips Fotografie  
De riddaksie leje

Oetgaaf:  
Sjtadsvastelaovesvereniging D'n Uul  
Posbös 11, 6040 AA Remunj

Vormgaeving:  
Ontwerpburö M  
[www.gewoonm.nl](http://www.gewoonm.nl)

Drök:  
ARS Printmedia

Ketak:  
[www.dn-uul.nl](http://www.dn-uul.nl)  
[uulewapper@dn-uul.nl](mailto:uulewapper@dn-uul.nl)



Copyright 2015

Alle sjrieverrechte mit betrekking  
toet de inhoud van dees oetgaaf  
waere oetdrökkelik veurbehaje.  
Dees rechte beröste bij  
Sjtadsvastelaovesvereniging D'n Uul  
Remunj ofwaal bij de betreffende  
sjriever.

## Oetligk layar

Vraag pap, mam of grote broor of zöster  
öm de layar app te insjtallere op 'ne  
sjlumme tillefoon of tablet. Op eder  
bladzej wo 't layar logo sjteit aafgebeeld,  
kins se nog 'n ekstra magische  
verrassing vinje! Wiej geit det? Sjtart de  
layar app, haaj de tillefoon of de tablet  
baove de bladzej en tik op 't beeldsjerm  
om de bladzej te skenne. Vervolges kins  
se ekstra fotoos zeen of 'n leedje heure!  
Väöl magisch plezeer!





# D'N UUL PRIZZENTEERT VEUR DE JEUG VAN REMUNJ...

- 11-01-2015** Middaag van de Nuuje Sjtadsjeugprins  
van D'n Uul | *Oranjerie*  
*Vanaaf 14.00 oer*
- 01-02-2015** Resepsie Sjtadsjeugprins van D'n Uul |  
*'t Witte Kirkske. Vanaaf 13.00 oer*
- 07-02-2015** Vastelaoveskirkdeens | *St. Christoffel Kathedraal*  
*Óm 18.30 oer*
- 08-02-2015** Kienjermusical mit naozit | *Oranjerie*  
*Veursjtèllinge óm 13.30 en óm 15.30 oer*
- 13-02-2015** Sjolefestasie | *Sjtasiëplein*  
*Van 13.00 toet 17.45 oer*
- 14-02-2015** Sjnapsnaazebal | *'t Witte Kirkske*  
*Van 16.00 toet 20.00 oer*
- 15-02-2015** Sjnapsnaazebal | *'t Witte Kirkske*  
*Van 16.00 toet 20.00 oer*
- 16-02-2015** De Grote Optoch | *Remunj*  
*Vanaaf 13.00 oet*
- 16-02-2015** Sjnapsnaazebal | *'t Witte Kirkske*  
*Van 16.00 toet 20.00 oer*
- 17-02-2015** Sjnapsnaazebal | *'t Witte Kirkske*  
*Van 14.30 toet 17.30 oer*
- 17-02-2015** Aaftraeje Sjtadsjeugprins van D'n Uul |  
*'t Witte Kirkske. Vanaaf 16.00 oer*

